

تورک یوردی

ناشری : تورک یوردی

مدیری : محمد مین

۲ مایس ۱۳۲۹

۲ یل

صافی ۱۵

دردلی صریح آقار « کرواتم ! » ديه ،
« عجب زرده قالدی آرسلانم ؟ » ديه .

کوپرلی زاده



تاریخ و آثار عقیقه

حاجی پاشا

(آناطولی) ده یتیشن تورک علماسنک اولولردن وجودیه افتخار اولونور
جامع الکمالات بر ذاتدر . تراجم احوال کتابلریمزدن باشده (شقایق نعمانیه)
اولوق اوزره بو یولده یازیلان آثاریمزک همان کافه سننده (آیدین) لی اولدینی
محرر سده کتبخانه عمومی ده کندی آل یازیسیله یازیلی (بایبورد) لی
(اکمل الدین) حضرتلرینک علم حدیثدن مشهور (مشارق شریف) شرحنک
صوکنده کی کتبه سی اولان : (حاجی پاشا بن خواجه علی القونوی الراجی الی
رحمة ربه اللطیف فی مدینه قونیة) عبارده سننه نظراً فی الاصل (قونیة) لی
اولدینی و صوکرده دن (آیدین) ه هجرتله بوراسنی کنديسنه وطن ثانی اتخاذا
ایتمسندن ناشی (آیدین) لی طانندی آکلاشیلیمور . اسمی (جلال الدین خضر)
اولان بو ذات عالی مدرسه تحصیلی مملکتنده بیتیردکن صوکره محضاً توسیع
معلومات ایچون (مصر) ه کیده رک اعظم علمادن (مبارکشاه منطق) دن
منطق تحصیلی بعدالاکمال هم فکری و من وجه ه مشهریسی بولنان (بدرالدین
سیاوی) ایله فضلا و متصوفه نک اکابرندن (شیخ اکمل الدین) حضرتلرندن
استفاده و استفاضه آیه دی .

بو اثنالرده وجودینه عارض اولان خسته لق دولایسیله (علم طب) تحصیلی

لزومنی ده آکلایه رق زمانی اطباسندن (طب) تحصیل ایله یوب کندیسنی تداوی ایتدیکی کبی بو علم ده کوستردیکی خداقتک مکافاتنی اوله رق (مارستان مصر) تسمیه اولونان دار التداوی یه (سر طیب) تعیین اولونه رق بر مدت ابناء جنسنی ده تداوی ایتدی . بعده وطننه عودت و اوتاریخده (آیدین) ملکی اولان (آیدین اوغلو محمد) بکک دعوت و التماسی اوزرینه (برکی) یه عزیمتله تدریس و تألیفه باشلادی . سنه لرحه بو وجهله عمر سوره رک (۸۲۰) کسور تاریخنده عالم آخرته کیتدی (رحمة الله علیه) . (آیدین) ولایتده سیاحتی ائناسنده کی تدقیقاعه کوره الیوم ناحیه مرکزی اولان (برکی) نک (خضرلق) دینلن یرنده مدفوندر . عالم اسلامک افتخار ایتدیکی مشهور مؤلفردن سیدالعلماء (شریف جرجانی) صاحب ترجمه (حاجی پاشا) نک علم و عرفاتی تسلیم و تصدیق ایدن ذوات عالیهدندر . آثارینک جمله سی غیر مطبوع اولوب بروجه آتی در :

(۱) مجمع الانوار فی جمع الاسرار : ایکی جلد اوزره مرتب عربی العبارة تفسیر شریفدر .

(۲) مسالك الکلام فی مسائل الکلام : مفسر مشهور (قاضی بیضاوی) نک دقایق علم کلامه دائر تألیفی اولان (طوابع الانوار) اسمنده کی اثر معروفک شرحی اولوب (آیدین) اوغوللرندن (عیسی بک) نامنه مؤلفدر .

(۳) حاشیه علی شرح مطالع الانوار : متداثر فاضل شهر (قاضی سراج الدین محمود ارموی) نک شرحی ده علامه (فخرالدین رازی) نک اولوب حکمت عتیقه ایله علم منطقک دقایقندن باحثدر .

(۴) منتخب الشفاء : (شفاء الاسقام) دن خلاصه ایدلمش علم طبه دائر (آیدین اوغلو محمد) بک نامنه مؤلف تورکجه بر اثر اولوب برنجی باب طبک علمی و عملی قسمندن ایکنجی باب غدالرك ، شربتلك ، دوالرك تراکیب و انواعندن اوچونجی باب امراضک اسباب و علائمندن باحث اولق اوزره اوچ بابدر . برر نسخه لری (تیره) ده (ابن ملک) ، (مغیسا) ده (مرادیه) کتبخانه لرنده اولدینی کبی (استانبول) کتبخانه لرینک ده بعضی لرنده واردر .

(۵) تسهیل : (شفا) دن کوچوک تورکجه طبی بر اثر اولوب بونکده نسخه لری مذکور کتبخانه لرده موجود اولدینی کی خط دستیه محرر نسخه سی کتبخانه عمومی ده در . بویکی اثر طبی نک آلمانجه یه ترجمه ایدلدیکی السنه شرقیه واقفلرندن دو قنور (هانس بارت) ک جمله افاداتنددر .

(۶) شفا الاسقام و دواء الآلام : اسمک دلالتی کی طبه متعلق عربی العبارة بر اثر در . (۷۸۲) تاریخنده (آیائلوغ) ده تألیف ایدلدیکی نهایتده محرر اولان بواثر جسیمک مؤلف خطیه محرر نسخه سی (اندرون هایون) ده کی (سلطان احمد ثالث) کتبخانه سنده در .

(۷) فریده : علم طبدن اوج باب اوزره مرتب عربی العبارة اولان بو اثرک برنجی بابی کلیات علم طب، ایکنجی بابی خواص الاغذیه و الادویه، اوچونجی بابی اسباب الامراض والعلامات والمعالجاتدن باحث اولوب مؤلف خطیه محرر نسخه سی (یکی جامع) کتبخانه سنده در .

(۸) الکی الجلالی : بواثرک اصل اسمی مؤلفک مقدمه سنده قید ایدلدیکی وجهله (السعادة والاقبال) در . آخرنده ایسه (کمی الجلالی) اسمیله ده تسمیه ایلهدیکی مذکور در . اوچونجی براسمی ده لفة اصل معناسنه اولان (کناشه) اسمیله ده معروفدر . عربی العبارة درت مقاله اوزره مرتب بر اثر طبی اولوب بر نسخه سی (لاله لی) کتبخانه سنده وارد .

(کم) ، تورکجه ده (یه ن) معناسنه در . (کمی الجلالی) مؤلفک اسمی اولان (جلال الدین خضر) ک یه سنده قولایقله طاشیدینی (مخطرۀ طب) دیمکدر .

